



Inatsisartuni ilaasortaq
Anthon Frederiksen
Partii Naleraq

Ilisimatusarnermit paasisat paasissutissiissutigineqartarnerat pillugu § 37 naaper- torlugu apeqquteqaatinnut akissut.

Asasara Anthon Frederiksen

Ilisimatusarnermit paasisat paasissutissiissutigineqartarnerat pillugu apeqqutitit qujas-
sutigaakka.

03-08-2015
Sagsnr. 2015 - 6576
Dok. nr. 802216

Postboks 1029
3900 Nuuk
Tlf: +299 34 50 00
Fax: +299 32 20 73
Email: iiknn@nanoq.gl
www.nanoq.gl

1. Ilisimatusarnermi paasissutissat tamakkiisumik nunatsinnut tunniunneqartarpaat ?

Akissut:

Kalaallit Nunaat ilisimatusarnermit paasisanit assigiinngitsutigut iluaquteqartarpoq.
Ilisimatusarneq oqaluuserineqaraangami immikkoortunut tallimanut
agguarneqarajuppoq:

- 1) Pinngortitamik ilisimatusarneq
- 2) Peqqissutsimik ilisimatusarneq
- 3) Inuiaqatigiinnik ilisimatusaatit
- 4) Oqaatsit, atuakkiat, oqaluttuarisaaneq filosofiilu
- 5) Teknologi

Immikkoortut taakkua tallimat iluanni ilisimatusarfiusut amerlasuut
ingerlanneqarput. Nunatsinnullu tunngatillugu pinngortitamik peqqissutisimullu
tunngasunik misissuinerit allanut sanilliullugit initullutik.

Nunap sananeqaataanut tunngasumik ilisimatusarneq ukiut ingerlaneranni
aatsitassarsiornermi suliniutinik arlalinnik kinguneqartarsimavoq. Ikummatissanik
ujarlerneq maannamut paasissutissanik iluaqutigineqarsinnaasunut ataatsimut
kinguneqarsimavoq, pisuussutit pigineqartut qanoq iluaqutigineqarsinnaanerit
eqqarsaatigalugu.

Peqqinnissaqarfimmi nakorsat suliame saniatigut ukiuni amerlasuuni ileqqoraat
peqqissutisimut tunngasunik ilisimatusarnermik ingerlatsisarneq. Ukiullu
ingerlaneranni taamaasillu innuttaasut peqqissusaannut tunngasumik
paasissutissanik peqartoqalerluni.

Tamanna peqqinnerulernissamut tunngasumik suliniutinik assigiinngitsunik kinguneqartarpoq, innuttaasullu peqqissusaannik ataatsimut isigalugu pitsaanerulersitsisimalluni.

Pisuussutit uumassusillit ilisimatusarfiupput annertuut, pingaarnertullu aalisakkat uumasullu piniagassat. Uumasut pissusilersortarnerat kinguaassiornerallu pillugit annertuunik ilisimasaqartoqarpoq. Ilisimasat kinguneqartut pinngortitamik avatangiisinik pisuussutinillu uumassusilinnik akisussaassuseqarnerusumik atuinermik.

Nunatsinni ilisimatusarnermik ingerlataqartut assigalugit Pinngortitaleriffik silarsuarmi ilisimatusarnermik ingerlataqarnera ataqqiniarneqartarpoq, tamannalu ullutsinni Nunatsinnut pissutsinut nittarsaassuulluni. Tamanna 2014-imi ukiomoortumik nalunaarutaani ersersinneqarpoq.

“Pinngortitaleriffiup Danmarkimi ilisimatuussutsikkut misissuisoqarfinnut pitsaanerpaanut nallersuussinnaanngorsimanera Kalaallit Nunaanni, Savalimmiuni Danmarkimilu misissuisoqarfinnut 91-inut sanilliussinerup ersersippaa. Issittumi misissuisarnermit ilisimatuussutsikkut allaaserineqarsimasut Pinngortitaleriffimmeersut ukiuni 2008-2011 Kunngaqarfimmi Danmarkimi tamarmi issuarneqarnerpaat pingajorisimavaat - Niels Bohr Institutet aamma Danmarks Meteorologiske Institut kisimik issuarneqarnerusimallutik”.

Issittumi inuuniarnikkut atugassarititaasut pillugit misissuineramik nunap inoqqaavisa akornanni ingerlatsisoqarpoq, Alaskamiit Chukotka-mut, ilisimatusarneq SLICA-mik taaguuteqartinneqartoq ingerlanneqarluni. Suliniut annertooujussuuvoq ukiullu qulikkaat arlariit iluanni ingerlanneqarluni. Nunat ilisimatusarnermi peqataasut ilisimasat katersorneqartut nutaat assigiinngitsutigut iluaqutigisimavaat.

Ataatsimullu eqikkaasoqarsinnaavoq nunatsinni ilisimatusarnikkut paasissutissat pissarsiarineqartartut annertuumik nunatsinni iluaqutigineqartartut.

2. Ilisimatusarnermi paasissutissat tunniunneqartarsimappata, taakku qanoq katersorneqarpat ? aamma qanoq iluaqutiginiarneqarpat ?

Akissut:

Ilisimatusarnissamut akuersissuteqartarnermut tapersiissuteqartarnermut, aningaasaliisarnermullu tunngaviusarput piumasaqaatit Naalakkersuisoqarfinnut pineqartunut nalunaarusiornissamik imaqartut. Taamaasillunilu Naalakkersuisoqarfiit nalunaarusianik atugassaqartarput. Nalunaarusiat ilaat killilimmik atugassiissutigineqarsinnaasarput, allalli tamanit soqutigisaqartunit aqqutissat assigiinngitsut aqqutigalugit pissarsiarineqarsinnaallutik.

3. Ilisimatusarniartut qanoq nalunaarsorneqartarpat ?

Akissut:

Ilisimatusarnikkut suliniutit Naalakkersuisoqarfinni ingerlatsivinniluunniit akuersisutininik tunniussaqaqartartuni nalunaarsorneqartarput.

4. Ilisimatusarniartunut suut piumasaqaataappat ?

Akissut:

Ilisimatuut piumasaqaatinik assigiinngitsunik naammassisaqartussaasarpuit, ilisimatusarsinnaajumallutik, - qinnuteqaammilu uppersarsarneqartussaapput ilinniakkat tunuliaqutaasut, CV, ilisimatusarnermit allaaserisat aamma naqitat suliarisarsimasat allassimaffiat.

Tamatumalu saniatigut piumasaqaatit assigiinngitsut naammassineqartussaapput, apeqqutaalluni ilisimatusarneq suliniuteqarfimmi sorlermi inissisimansoq. Assersuutigalugu taaneqarsinnaapput piumasaqaatit nunap iluani misiligutissanik aallerniarnerni, humanbiologiskimik paasissutissanik atuinissami ileqqorissaarnikut piumasaqaatit.

Nunatsinni ilisimatusarnikkut siunnersuisoqatigiit 2014-imi piviusunngorput. Siunnersuisoqatigiit suliasaraat ilisimatusarnermi siunnersuisarneq ilisimatusarnermullu aningaasaaliissutinik agguasaarneq, Inatsisartut inatsisaat nr. 5, 29. november 2013-imeersoq tunngavigalugu. Siunnersuisoqatigiillu aamma suliasaraat Naalakkersuisut ilisimatusarnermut tunngasutigut siunnersortarnissaat.

Inussiarnersumik inuulluaqqusilluta
Med venlig hilsen



Nivi Olsen